

## **Mahathir, Anwar dan Cina Kepong Baru**

**SINAR HARIAN**

**27 JUN 2018**

**ISMAIL HASHIM YAHAYA**

SELASA lepas saya dikunjungi oleh jiran - komuniti Cina di Kepong Baru tempat saya tinggal dalam kunjungan pada hari raya. Selaku Pengerusi Persatuan Penduduk Aktif Kepong Baru pada setiap hari raya mereka akan mengunjungi rumah saya sebagai satu-satunya rumah Melayu terakhir di jalan tempat saya tinggal.

Tidak ramai masyarakat Melayu yang tinggal di Kepong Baru, terasa Melayu pupus di Kepong Baru. Asalnya mengikut bapa mertua, pada tahun 70-an ramai penduduk Melayu yang tinggal di kawasan lain di lembah Kelang berpindah ke Kepong Baru yang cadangannya hendak dijadikan Kampung Baru kedua. Tetapi selang beberapa tahun sekitar 1980-an, kawasan Shah Alam dibangunkan dengan tawaran rumah berkembar dua tingkat dan banglo yang harganya agak berpatutan di Shah Alam.

Maka penghijrahan orang Melayu ke Shah Alam meninggalkan kekosongan untuk diisi dengan kebanjiran komuniti Cina.

Semasa kunjungan jiran-jiran Cina ke rumah saya, soalan yang banyak mereka bicarakan ialah mengenai kemenangan Pakatan Harapan (PH) dan Tun Dr Mahathir.

Jawapan yang diberikan semasa kunjungan mereka ke rumah saya ialah kami suka Dr Mahathir. Saya bertanya kepada mereka kenapa suka Dr Mahathir. Salah seorang jiran yang namanya Mr Lo (bukan nama sebenar) menjawab: "ini orang tua banyak toleran dan `understanding`."

Saya bertanya kepada Mr Lo: apa yang dia maksudkan dengan toleran dan 'understanding' itu, dia menjawab "Dr Mahathir bagi jawatan kanan kepada Guan Eng dan Menteri Pengangkutan kepada Mr Anthony Loke ma."

Saya menjawab, "ini kerana mereka boleh buat kerja dan kompeten," dan DAP adalah komponen penting dalam PH, memang wajar diberikan jawatan tersebut.

Lagi pun jawatan ini pernah disandang oleh menteri-menteri dari MCA dahulu.

Tiba-tiba Mr Ang (bukan nama sebenar) seorang lagi jiran mencelah, komuniti Cina tidak suka Datuk Seri Anwar Ibrahim. Saya bertanya; "kenapa". Dia menjawab: Dia kuat Islam dan kita amat takut. Dia sudah lebih 10 tahun meninggalkan politik dan kita tidak tahu dia boleh memerintah atau tidak."

Saya menjawab: "Apa yang hendak awak takut, potong tangan ke, itu semua tidak betul. Selama ini awak hidup dengan selamat ada rasa risau ke." Jelas saya lagi, "awak mesti ingat siapa mencetuskan kesedaran rakyat ini, mengerakkan reformasi sehingga mencapai kejayaan menumbangkan Barisan Nasional."

Saya tegaskan kepada rakan Cina, ini bukan bermakna saya menyokong Anwar secara tegar dan membuta tuli.

Dia mencelah: "Itu Dr Mahathir, the winning factor, itu sebab komuniti Cina sokong." Saya menerangkan: "bukan komuniti Cina, orang Melayu, India, Iban, Kadazan pun sokong, sokongan komuniti Cina mungkin telah bermula pada pilihan raya lepas dan faktor Pas juga."

"Pas telah meninggalkan Pakatan menguatkan sokongan pengundi Cina dengan padunya kepada PH," kata saya.

Saya katakan: "Tidak dinafikan personaliti Dr Mahathir dan rakan-rakannya seperti Tun Daim dan Tan Sri Rafidah Aziz menjadi pemangkin, tetapi Dr Mahathir pun ada mengatakan Anwar adalah pengganti beliau dan Anwar seorang yang faham akan kepelbagaian agama dan kaum di negara kita. Dia mempunyai pengalaman semasa menjadi Timbalan Perdana Menteri dahulu."

Seperkara lagi, mereka mengatakan bahawa komuniti Cina suka dengan Mat Sabu yang mudah berinteraksi dan baik dengan Guan Eng.

Saya bertanya: "Mana awak dapat tanggapan sebegini." Dia menjawab: "ini hasil daripada pertemuan sesama dan membaca di akhbar Cina."

Dia pun tersenyum.

Kita juga tidak seharusnya hidup dalam kepompong Melayu dengan tidak mendengar komuniti setempat misalnya di kawasan di Kepong Baru. Mereka dirasakan agak bimbang jika perkataan Islam disebutkan dan adalah dirasakan suatu strategi komunikasi korporat dan perhubungan awam amat diperlukan bagi memulihkan imej Islam daripada bersifat fobia kepada mesra dengan bukan Islam.

Tidak dipastikan bagaimana demonstrasi bersih, gerakan-gerakan dan ceramah-ceramah menentang kerajaan BN semasa itu mendapat sokongan terhadap PKR dan Anwar kini telah bertukar menjadi imej kritikal dan tidak berapa disukai terhadap Anwar.

Suatu kajian persepsi harus dinilai semula.

**© 2018 All Rights Reserved • Karangkrak Group Media • © 2018 Hakcipta  
Terpelihara • Kumpulan Media Karangkrak**

Source: <http://www.sinarharian.com.my/karya/pendapat/mahathir-anwar-dan-cina-kepong-baru-1.849644>